

MEMORIA XUSTIFICATIVA E ECONÓMICA DO CONVENIO ENTRE A CONSELLERÍA DO MEDIO RURAL E ASOCIACIÓN PURA RAZA CABALO GALEGO (APRG) PARA CONTINUAR COA EXECUCIÓN DAS ACTUACIÓNS DESTINADAS Á POSTA EN VALOR DAS APTITUDES DO CABALO PRG EN ACTIVIDADES DEPORTIVAS, DE EXPOSICIÓN E OCIO, COFINANCIADO CO FONDO EUROPEO AGRÍCOLA DE DESENVOLVEMENTO RURAL (FEADER), NO MARCO DO PDR DE GALICIA 2014_2020.

Esta consellería do Medio Rural é o órgano da Administración autonómica que ten atribuído o exercicio das competencias en materia de desenvolvemento das accións necesarias para a ordenación, fomento e control da produción gandeira, así como na elaboración e execución dos programas de conservación e fomento dos recursos zootécnicos autóctonos de Galicia e, en consecuencia, nos programas de mellora xenética do gando, tal como se recolle no Decreto 149/2018, do 5 de decembro, polo que se establece a estrutura orgánica da Consellería do Medio Rural e se modifica parcialmente o Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia.

No mencionado ámbito material, constitúe un dos obxectivos a conservación dos recursos zootécnicos autóctonos de Galicia en perigo de extinción.

Antecedentes

En Galicia, a explotación sostible e rendible dos recursos xenéticos gandeiros autóctonos en sistemas de produción de calidade altamente compatibles co medio ambiente, é posible en gran parte pola rusticidade e a gran capacidade adaptativa das razas, ao que habería que sumar a facilidade de manexo e mansedume. Para o caso do cabalo PRG, estas características explican a súa boa aceptación nas distintas disciplinas hípias, así como a predisposición natural destes animais á andadura.

A submedida 10.2 do Programa de Desenvolvemento Rural de Galicia para o período 2014-2020 relativa á conservación de recursos xenéticos na agricultura, ten entre os

CONSELLERÍA DO MEDIO RURAL
DIRECCIÓN XERAL DE GANDARÍA, AGRICULTURA E INDUSTRIAS AGROALIMENTARIAS
SUBDIRECCIÓN XERAL DE GANDARÍA
SERVIZO DE PRODUCIÓNS GANDEIRAS E BENESTAR ANIMAL
Edificio administrativo núm. 4 de San Caetano, 2ª planta
15781 Santiago de Compostela
T: +34 981 546 180
prodgandeiras.sscg.cmr@xunta.gal
mediorural.xunta.gal





seus obxectivos a posta en valor de todas as posibles orientacións produtivas das razas autóctonas de Galicia.

APRG é unha asociación profesional, sen ánimo de lucro, constituída no ano 1997, con ámbito de actuación en todo o territorio da Comunidade Autónoma de Galicia e que dende hai anos mantén unha colaboración directa coa consellería en actividades vinculadas coa recuperación, fomento e difusión da raza PRG.

Entre os obxectivos primordiais da asociación están:

- Mellorar a produción do gando equino, incrementando a rendibilidade deste tipo de explotacións gandeiras.
- Velar pola axeitada execución do Programa de Conservación, Preservación, Recuperación, Selección e Fomento do Cabalo de Pura Raza Galega.
- Propor liñas e proxectos de investigación que respondan ás necesidades dos gandeiros.
- Recuperar, potenciar e defender as rutas a cabalo e actividades equinas dos camiños de Santiago.
- A formación e profesionalización dos gandeiros e criadores da raza.

A Consellería do Medio Rural e APRG veñen colaborando nos sucesivos Programa de desenvolvemento rural de Galicia mediante actuacións na conservación dos recursos zootécnicos autóctonos. No ano 2020 asinase o último convenio para a execución de actuacións destinadas á posta en valor das aptitudes do Cabalo PRG en actividades deportivas, de exposición e ocio.

Finalidade

Para os efectos sinalados, tense previsto formalizar con APRG o instrumento convencional arriba referido por un período de vixencia que abrangue dende o 01 de xaneiro de 2023 ata o 31 de agosto de 2025.

O convenio ten por obxecto establecer as condicións das actuacións realizadas por APRG para continuar coa execución das actuacións destinadas á posta en valor das aptitudes do Cabalo PRG en actividades deportivas, de exposición e ocio.





O instrumento convencional que se pretende asinar fundaméntase no seguinte:

A explotación sostible e rendible dos recursos xenéticos gandeiros autóctonos mediante o aproveitamento dos recursos naturais sen esquecer a protección do medio ambiente, é posible en gran parte pola rusticidade e a gran capacidade adaptativa destas razas, sen esquecer, como xa se comentou anteriormente, a facilidade de manexo e mansedume. Estas dúas características fixeron que administración e asociación de criadores, co obxecto de afianzar a raza, decidiran no seu día repartir a atención a outras orientacións produtivas na cría e selección do cabalo PRG, para o seu emprego en actividades hípcas, doma de alta escola, enganche, así como noutras modalidades deportivas como o raid e o salto de obstáculos entre outras.

A submedida 10.2 do Programa de Desenvolvemento Rural de Galicia para o período 2014-2020 relativa á conservación de recursos xenéticos na agricultura, contempla entre os seus obxectivos a posta en valor de todas as posibles orientacións produtivas das razas autóctonas de Galicia así como a diversificación das actividades económicas no medio rural.

Os traballos de colaboración entre a Consellería do Medio Rural e APRG con razas en perigo de extinción deben ser ininterrompidos, as labores de conservación, asesoramento e difusión non deberían deterse polo que a renovación dos compromisos adquiridos suporá unha continuidade temporal que resulta imprescindible nas tarefas de recuperación das razas autóctonas.

O desenvolvemento deste programa, só é posible coa participación de APRG xa que é a única asociación en Galicia que desenvolve actividades de doma con cabalos de Pura Raza Galega, que conta coa infraestrutura, medios loxísticos e de persoal necesarios e suficientes para realizar as actuacións obxecto deste convenio, ademais dunha ampla experiencia, indispensable neste tipo de actuacións. Nestas condicións o procedemento ordinario de concorrencia competitiva na concesión de subvencións resulta improcedente, por canto a entidade destinataria resulta imprescindible para a xestión do programa.





O procedemento ordinario de concorrência pública na concesión de subvencións resulta improcedente, por canto APRG resulta imprescindible para a execución do programa. A Lei 9/2007, do 13 de xuño, de subvencións de Galicia, prevé a concesión directa de subvencións cando se acrediten razóns de interese público, social ou económico. No mesmo senso se expresa o artigo 36.c do Decreto 11/2009, do 8 de xaneiro, polo que se aproba o regulamento da lei. Por outra parte, o artigo 40.1 do mesmo decreto posibilita a concesión de subvencións directas mediante convenio, nos casos en que se acrediten razóns de interese público, social ou económico.

APRG cumpre cos requisitos establecidos para obter a condición de beneficiaria, segundo o artigo 10 da Lei 9/2007, do 13 de xuño, de subvencións de Galicia.

Polo exposto, estímase xustificada a utilización do instrumento do convenio para articular as actuacións de referencia, quedando o devandito convenio fora do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE y 2014/24/UE, do 26 de febreiro de 2014, con independencia de que, de acordo co previsto no artigo 4 da devandita norma, lle sexan de aplicación os principios desta Lei para resolver as dúbidas e lagoas que puidesen presentarse.

Financiamento

A Consellería do Medio Rural financiará as actuacións do convenio a desenvolver por APRG, no marco da Submedida 10.2 do PDR de Galicia, cofinanciado polo Fondo Europeo Agrícola de Desenvolvemento Rural (FEADER) cunha porcentaxe de financiamento do 75%.

O importe total ascende a cento setenta e catro mil euros (174.000,00 €) para o período 2023-2025, dispoñibles na aplicación 2019.14.04.713C.781.1, código de proxecto 2016 00191. Estará condicionado á existencia de dispoñibilidade orzamentaria e distribuírase coa seguinte dotación máxima para cada unha das anualidades do convenio:





- 63.000,00 € para o ano 2023, dos que 3.000,00 € estarán destinados á participación nos eventos Feira Internacional Semana Verde de Galicia e SALIMAT.
- 63.000,00 € para o ano 2024, dos que 3.000,00 € estarán destinados á participación nos eventos Feira Internacional Semana Verde de Galicia e SALIMAT.
- 48.000,00 € para o ano 2025, dos que 3.000,00 € estarán destinados á participación nos eventos Feira Internacional Semana Verde de Galicia e SALIMAT.

Respecto da tramitación do expediente de gasto, resulta de aplicación o establecido na Orde da Consellería de Economía e Facenda do 11 de febreiro de 1998, modificada polas ordes do 27 de novembro do 2000 e do 25 de outubro de 2001, relativa á tramitación anticipada de expedientes de gasto, polo que queda condicionada a súa eficacia a que exista crédito adecuado e suficiente nos orzamentos da Comunidade Autónoma de Galicia para o ano 2023.

Poderanse efectuar pagamentos a conta, pagamentos fraccionados que responderán ao ritmo de execución das accións subvencionadas, sempre de acordo co disposto no artigo 67 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, abonados por contía equivalente á xustificación presentada a conta da liquidación final.

Por todo o exposto, solicítase a tramitación do Convenio entre a Consellería do Medio Rural e APRG, para continuar coa execución das actuacións destinadas á posta en valor das aptitudes do Cabalo PRG en actividades deportivas, de exposición e ocio, cofinanciado co Fondo Europeo Agrícola de Desenvolvemento Rural, no marco do PDR de Galicia 2014_2020.

Santiago de Compostela, á data da sinatura.

O director xeral de Gandaría, Agricultura e Industrias Agroalimentarias.

Asinado dixitalmente no lateral.

